

## **Kuv Niam Lub Neej Thaum Hluas**

By Paj Huab Vaj

2<sup>nd</sup> Year Hmong Heritage Class

Thaum kuv niam yog ib tus ntxhais hluas, nws yeej tsis muaj sij hawm mus ua si li. Nws qhia rau kuv hais tias, thaum tus qaib qua kias sawv ntxov, txawm hais tias tseem tsaus ntuj nti nraum zoov los nws yeej tau sawv mus ua hauj lwm. Kuv niam hais tias nws lub neej txom nyem heev. Nws nij hnuv mus ua teb xwb. Tsis tas li ntawd, txawm hais tias nws yuav ua teb ib hnuv los, nws los txog tsev nws tseem tau mus ua zaub mov noj thiab.

Kuv niam yeej xav hais tias, ua ib tug ntxhais hluas nyob rau Amelikas yeej yooj yim tshaj li ua ib tug hluas nyob rau tim Nplog Teb. Tim no, yog hais tias yus xav mus kawm ntawv los yus yeej mus tau. Tab sis, nyob rau tim Nplog Teb, txawm hais tias nws xav mus kawm ntawv npaum li cas los nws yeej mus tsis tau. Txhua' zaum kuv niam noog nws niam thiab nws txiv kom lawv cia nws mus kawm ntawv, tabsis nkawd yeej cem nws thiab hais rau nws hais tias nws yog ib tug ntxhais xwb, vim li ntawd, nkawd thiaj tsis kam. Tsis tas li ntawd, kuv niam qhia rau kuv hais tias txawm yog nws xav mus kawm ntawv los, nws yeej tsis muaj nyiaj li nws thiaj li ua ib siab mus ua teb thiab mus khwv noj khwv haus lawm xwb.

Thaum kuv niam yog hluas nkauj, nws ua ib tug neeg siab zoo heev thiab paub xav heev. Thaum kuv cov dab laug mus yuav tau poj niam los tsev, kuv niam tais laus cia nws cov nyab nyob ua si xwb, es txib kuv niam thiab kuv cov niam tais mus ua hauj lwm. Kuv niam hais tias nws nyob ua qhev xwb. Vim li ntawd nws thiaj li tsis muaj sij hawm mus ua dab tsi li. Kuv niam lub neej thaum nws tseem yog hluas nkauj tsis yooj yim li, thiab nws hais tias nws twb tsis muaj sij hawm ua hluas nkauj li. Thaum nws muaj hnuv nyoog tsaus ces nws yeej pib khwv nws lub neej lawm.